

續修陝西省通志稿

第九十九冊

卷一百八十七至一百八十九

續修陝西通志稿卷一百八十七

藝文五

外編一

省府廳州縣志書一

陝西全省通志三十二卷清康熙間陝西巡撫曲沃賈漢復等修
秦省通志聘取八府及各處名流纂修五載方始告竣今同閩
司張夢椒咸寧令黃家鼎長安令梁禹甸公議將志版收儲尊
經閣著西安府儒學教授經管上交代印信簿籍如有損失責
在經管教官刊入志內永垂不朽至於關中書院坐落咸寧地
方今既重修其間公堂正舍以爲作養士子講學課業之所儀
門外左右房屋許本省士大夫往來停驂地方官不得借爲公
館一切遊客不得擅自居停衙役市棍不得混入騷擾作踐房
舍如有不遵前約執此赴督撫兩臺稟究決不輕貸誠恐日久

廢弛議令咸寧縣并三學教官經管諸人不得爭論俱應入志
永垂不磨康熙七年三月十五日巡撫賈親筆

附約言

按是志創於明成化乙未其後嘉靖辛丑萬歷辛亥兩修之順
治戊戌曲沃賈公撫豫曾修豫志及壬寅撫秦以前志雖有稿
本而未成書遍檄八郡哀聚掌故招集英彥芟繁就簡黜陋存
雅而後授梓殆踵豫志之體例而更稱美備者也

西安府志八十卷清乾隆間知府任邱舒其紳修

按府志舊有王紹徽撰本以其闕黨故其書不存乾隆丙申中
丞畢沅入覲特奏重修西安府志上俞所請旌節旋轅諭首郡
太守田錫莘排纂江寧嚴侍讀長明武進莊州倬忻佐之未幾
田守捐館舒其紳蒞任因侍讀長編早竟囑其甄綜史例編次
卷帙爲門一十有五首天章次地理次名山次大川次建置次

食貨次學校次職官次人物次選舉次大事次古蹟次藝文次金石次拾遺分類五十有一統計成書八十卷經始於乾隆丙申秋仲告成於己亥冬初後先四載畢中丞序稱文既簡要事復賅綜具程大昌之博議而謝其繁蕪擅何景明之雅材而加以典實蓋侍讀讀書破萬卷故能衷百論以貫三長也

長安縣志三十六卷清嘉慶間知縣桐城張聰賢修

按長安志昉於明萬歷四十三年知縣李華然時工部尙書馮從吾以御史家居爲撰定刊行遭李自成亂散失清康熙初知縣梁禹甸求得舊本更加附益都爲八卷一地理二建置三貢賦四官師五選舉六封建七人物八雜記至嘉慶十六年知縣張聰賢延陽湖董曾臣重修凡三十編圖四表四志二十傳十都三十六卷大要叙疆理而省名勝錄政典而芟稗野昏明早

晚標農事之準而星土不書城郭宮室述規畫之方而景物從節詞賦小技則退題詠而進經籍二氏幽學則畧釋老而詳藝術所有逸事異聞語怪無徵皆所不取蓋體沿史法不盡倣圖經也

咸寧縣志八卷清康熙間知縣穎上黃家鼎修

按咸寧舊無志至明萬歷時北海陳公始修之康熙七年都御史賈公有修志之檄家鼎多方搜集獲陳志二卷補續成草以備通志採摭及竣遺落又半更爲編纂是書始星輿訖藝文爲卷凡八自分野至志銘爲目九十有九質以殘本參以經傳證以詩史續以繼起更以跋涉訪以故老存其是者刈其非者辨其似是而非似非而是者掇之灰燼之餘歷以寒暑之久家鼎自序有云以不敢誣古之心不敢自誣即以不敢自誣之心並

不敢誣後人以云簡則簡矣以云能括則未也以云未詳則有之以云未真庶幾免矣况善善長而惡惡短尤夙志哉

咸寧縣志二十六卷清嘉慶間知縣靜海高廷法江寧沈琮修

按咸寧志依史圖表志傳例圖二首疆域山川經緯道里城郭坊社次歷代疆域水道城郭宮室名勝表三首紀事沿革次職官次選舉志八首地理次田賦次祠祀次衙署次學校次陵墓次經籍次金石傳十首良吏次列傳次忠節次孝友次義行次儒學次文藝次隱逸次方技次列女圖以開方經緯爲主自城社山谷歷代疆域古渠舊城悉具於圖圖系以考與志相表裏惟地平經緯恆以二百里差一度咸寧境之錯入他縣中者至三百餘里之遠晨昏晝夜皆有積差遵西域圖志載晷度例作縣境經緯圖而刪星野山原脉絡水道原委地理志綜其大綱

仍於各社圖後分註始末南山溪谷錯雜道里紆迴則依山脈自西而東繪爲長圖其磨溝龍王廟溝錯入鎮安藍田者別附於後考據古蹟必實指其地某村不依方志僅云在縣某方或言某方幾里隋唐京城制度悉本宋敏求長安志三內禁苑悉本元李好文長安圖至宮殿方位間有舛訛諸坊錯漏則以六典唐書及百家傳說互爲攷證具之於圖仍錄原文於考中唐城今城合繪一圖以朱墨別之宋金元城與今城大同小異分爲圖考明城則除駐防外悉與今同不更圖城南古蹟最多據宋張茂中記爲圖趙惻與張記相表裏亦並錄之紀年不純用甲子科目必書某年遵史例也戶口舊附田賦自康熙恩詔後續生人丁作爲盛世滋生冊永不加賦而戶口與田賦分而爲二保甲之法以地統人至爲核實則以嘉慶二十一年保甲冊

爲準附入地理志而田賦志內惟載舊時丁額亦遵史例也藝文無裨世道雖美勿彰則依宋羅願新安志例附藝文於各條不另立名目惟有關典章制度及風俗人心者得載經籍志內傳首良吏爲官斯土者勸先賢先達以列傳統之其忠節等仍如史例分傳數世同居者列孝友傳其親見七代五代者類及焉邑人未論定者不入傳惟節婦例得旌表者或專傳或合傳以時代爲次耆民葆性養真附之隱逸壽婦入列女傳此發凡起例之大要其編輯則武進陸燿遒陽湖董祐誠也

咸陽縣志二十二卷清乾隆間知縣臧應桐修

按咸陽志創自明宏治七年邑令趙璉爲書十卷分八綱清順治九年江令山秀重修之中歷蕭令如蕙黃令中璜至康熙四十二年張令枚先後接踵釐爲四綱四卷體製似覺謹嚴然實

多率漏乾隆十六年東海臧令蒞任延集邑紳分門採訪同心
訂較閱春夏十旬之功繪圖七提綱十八列目九十有七分卷
二十二張方伯若震爲之序

興平縣志八卷清雍正間知縣桐城胡蛟齡撰

按興平志明嘉靖中蜀章斗陽先生所編清順治十六年知縣
禾水徐開熙重修之但沿訛實多如第一卷沿革條內蒯城係
晉泰始中所置而刊作薊城稷州係唐武德初所置而刊作魏
州黃初係魏文帝而刊作英初大足係唐武后年號而刊作大
定又八政以食爲首養而後教宜有次第徐志八卷禮制第三
食貨居七官師居四藝文以唐千福寺碑爲首而司馬相如董
仲舒諸作反在其後皆體例之可議者蛟齡雍正十年與邑人
劉大年程宣楊如龍商權以舊志爲經分門別類次第連綴兩

閱月告成建置後即次田賦移官師於第五在田賦禮制後藝文以時代爲先後謂孔廟爲文治之源興作豈可無紀涇陽魏公武功張公二碑記立在學宮典則詳贍特用冠首以崇教化次釋門神廟次古今忠孝名人次山川勝跡時事卷帙頗多釐爲上下則仍舊志例焉

興平縣志二十五卷清知縣元和顧聲雷撰

今興平之地爲西漢置縣之始者曰槐里縣孝武帝又於槐里之茂鄉起陵置縣曰茂陵縣孝昭帝亦起陵於槐里曰平陵置平陵縣或謂在今之咸陽然據杜佑通典曰廢邱漢高帝改名槐里武帝割置茂陵縣有武帝茂陵昭帝又割其地置平陵縣有昭帝平陵此說顯然可據魏文帝改平陵縣爲始平縣唐改始平縣爲興平縣今沿其名置縣旣多鄉賢燦著又漢時每徙

他郡豪傑貲財大戶以實其地故茂陵平陵二縣僑寓之人亦最衆多詳采正史臚列可觀並匪出於假借附會舊志最先之本不傳今所傳惟乾隆元年所纂本閱今四十餘年一切建置多有不同官師科名亦有未詳余故令重爲采輯成書二十五卷較舊志殊稱美備焉

畢沅序

興平士女續志三卷清光緒間知縣伏羌王權撰

同治之元訖於丁卯口回迭寇邑境義士健兒持白梃角劇寇至剖胸決脰不反顧儒冠抗節巾幗死烈者尤衆朝廷頻詔訪求大府設局彙報甲戌秋杪權捧檄承乏越明年延舉人張炯等分途採訪先後報局彙詳奏請得旨旌卹者男女共二千三百六十一人建坊入祠以次舉行事竣採訪羣士相聚謀曰州縣之志所以備故實示勸懲也然天文地理賦役職官第資考

證前志具備可無多贅惟人物一門風化所繫數十年不續即有散佚放失之懼邑疊遭兵燹士女效忠赴義磊磊多奇蹟不及今編輯成書大節盛美久將日就淪沒可若何以編纂推權權念發潛翊教長令職也義不可卻乃以公暇整齊纂述列男女死事者於前而次卓行可傳者於後凡爲忠節傳一孝義傳一文學傳一列女傳上下各一編爲三卷題曰興平縣士女續志附邑志後嗟呼節義非以求名也而造物者必以名報之然其得傳與否若又有數存焉明季流寇之亂蔓延十餘載邑志僅載三烈婦罵賊死者二赴井者一今此書列傳紀死節之士百七十九人女八十一人其無事實附見姓名者又數百人何今昔之懸殊哉吾以知前世之殉節而失傳者衆也豈非長民者之責耶然陵谷遷轉父老彫零語焉不詳聞焉罕證即此書

所遺漏尙不知凡幾也悲夫

自序

鄂縣新志六卷清乾隆間武功孫景烈編

序目云志法首地理次建置古今作者大較然矣地之山川形勝天作也而疆域古蹟亦茲地已具者述地理第一城郭學校官廨神祠均地理中建置事述建置第二諸建置爲民也民以田爲生有田則有賦故田賦編次第三教養斯民者官師也故官師編次第四官師能移風易俗故第五曰風俗風俗成而人物興故第六曰人物人物多以選舉顯故編次選舉第七懼其疏也以雜記終焉凡八篇而斯邑之志其庶幾足徵矣乎

自序

按新城王阮亭云近世郡縣志無逾秦者以其文簡事覈猶有黃圖決錄之遺而於康對山武功志外即推王泮陂鄂志洵鉅識也但自萬歷丙申濮州王九皋蒞任繼王太史修志以詳爲

貴而太史原志板遂失傳矣莒州劉璞知縣事又著鄴志凡爲卷十一爲目四十有四大要增於王太史者十之五而損於王令尹者十之六中南敦物山人趙曰睿云劉續可嗣響漢陂乾隆甲午江寧汪以誠蒞鄴以漢陂創志後續修者毀其原刻屢續而屢失其法以爲鄴志宜作而不可再續次年聘武功孫西峰太史主講明道書院兼任修志西峰年逾古稀自丙申春二月操觚至冬十有一月脫稿辭講席歸仍挾志稿重經筆削漸次寄鄴且囑就正秋帆畢中丞而後付梓志凡八篇其文簡以馴其事覈以括其法之有倫如一篇焉觀序目亦思過半顧其義例又各詳見諸篇中非澈始終觀之恐未易知其精蘊也

藍田縣志十六卷清光緒間知縣陽湖呂懋勳修

按藍田志雍正八年縣令李元昇纂修嘉慶元年馬令學賜續

新陝西通志卷一百八十一
修道光十九年胡令元煥又修之至光緒元年呂令懋勳增修之卷帙次第條例後先一仍其故惟以灞澃各源舊說輻輳邑主事袁廷俊生長鄉邦諳練故實身任總修乃徒步裹糧褰裳披莽由委窮源而正之昔人云百聞不如一見尤足信今傳後補前志之未詳至天文刪填星掩鉞熒惑入東井二事特作地平高弧表以明授時之準地理仿圖經例以圖冠首圖後有注縣境全圖二十里山脈道里皆用開方惟水勢曲折非開方所能盡故川脈不用開方沿革紀事年經月緯合爲一表古蹟風土統諸土地志金石前志所無不憚搜羅以補其闕洵可謂爾雅於古潤澤於今者矣

臨潼縣志六卷清乾隆間知縣山右史傳遠修

按臨潼志宋元以前作者俱不傳明有司訓樊玠志邑尙書武

之望志清初有邑庠生高鸞翔志舉人米調鼎志然皆散失無
攷惟知縣趙于京號香陂山東歷城舉人名宦傳稱其纂修邑
志詳畧得宜其志序云承乏於茲載書數簞自隨蒞事三載凡
所披覽有關於潼者輒標記加白帖日積既多康熙辛巳夏五
月農忙官閒手草星野建置山川古蹟諸門劉考功魯如見而
欣賞而張子潛谷申子若山張秀才宏璧復採訪參酌又康子
太乙適自鄠杜間來留與共訂成十志共八卷乾隆四十一年
武鄉史伯猶履任以趙志惟華清記最爲詳密其他未免稍畧
如縣治沿革名雖具列而源流分合及實在各處所皆未分條
指晰讀者茫然乃延崑山徐德諒平湖楊應棟兩名流並邑知
名士相與遠稽博訪上自正史旁及諸記下逮舊聞凡有關志
事者無問鴻纖俾各收錄規模悉遵趙舊惟即其所未載及載

而弗詳者依類尋討端委必盡耳

臨潼縣續志四卷清光緒間邑人楊彥修及旌德譚慶修

按續志以縣治沿革山川故蹟前志已備無庸復敘惟同治建元兵燹頻仍鄉人士忠節義烈幽晦未彰搜輯必周堡寨倉儲學校前所畧者必令精核纖細可稽至測繪晷度及太陽距地度數日景長短亦較他志爲詳洵志地之善者也

渭南縣志八卷清雍正間知縣鹽亭岳冠華修

按渭南志始於嘉靖辛丑圖二表四考五傳七凡一十八卷邑人知府南元善纂萬歷庚寅參議南軒續之爲目一十有二天啟辛酉尙書南師仲續之皆南氏子姪纂父祖之書也清順治丙申知縣尙九遷陸贊奇先後聘人邑通判朱可衿舉人劉懿宗增修雍正八年詔天下纂修通志冠華公餘加意采訪廣爲